


17 IANUARIE/24 Iunie

**ACATISTUL
SF. CUVIOS
ANTONIE
DE LA DIMSK**



ACATISTIERUL PE IANUARIE-RU



АКАФИСТ ПРЕПОДОБНОМУ АНТОНИЮ ДЫМСКОМУ

Кондак 1

Избранный воине Христов, обители Дымския устроителю и наставниче монахов богомудрый, преподобне отче Антоние, восхваляем тя с любовию в песнях духовных, яко победителя мирских соблазнов, плотских похотей и ухищрений диавольских и скорого недугов душевных же и телесных целителя. Ты же, яко имеяй дерзновение ко Господу, от всяких нас зол и обстояний свободдай, да зовем ти: Радуйся, преподобне Антоние, земли Тихвинския молитвенниче и преславный чудотворче.

Икос 1

Ангельское житие возлюбив от юности своея, преподобне отче Антоние, дивный образ был еси добродетелей христианских, и ангелу Божию подобен был еси чистотою сердца, незлобием и светлостию ума твоего. Темже избра тя Господь к подвигом иноческим и яви Церкви Своей великаго подвижника и чудотворца, наставника инокам сильного словом и делом, имущаго к Нему дерзновение молити о избавлении нас от

всех бед и скорбей. Сего ради восхваляем тя
сице:

Радуйся, родителей благочестивых чадо
благословенное;

радуйся, Великаго Новаграда светильниче
пресветлый.

Радуйся, во обители Хутынстей пристанище
спасения обретый;

радуйся, мужественно благое иго Христово на
себе возложивый.

Радуйся, единого Господа всем сердцем
возлюбивый;

радуйся, сосуде, Божия благодати
преисполненный.

Радуйся, пустынножителей славо и похвало;
радуйся, земли Тихвинския духовное

просвещение.

Радуйся, обители Дымския первоначальниче и
устроителю;

радуйся, земный ангеле и человеке небесный.

Радуйся, к великим преподобным отцем
Православия сопричтенный;

радуйся, яко Престолу Царя Славы ныне
предстоиши.

Радуйся, преподобне Антоние, земли Тихвинския
молитвенниче и преславный чудотворче.

Кондак 2

Видя Господь чистоту сердца твоего, от юности к исканию единого на потребу направи твой помысл, преподобне. Ты же, аще и млад быв, обаче силу словес Христовых: «аще кто хочет по Мне ити, да отвержется себе, и возмет крест свой, и последует Ми» уразумел еси, и Тому невозвратно последовал еси. Темже любви ради Христовы, родителей твоих и дом отеческий оставил еси, всякаго мирскаго пристрастия свободився, и водворился еси с работающими в иночестем чине, во еже непреткновенно воспевати Богу песнь: Аллилуиа.

Икос 2

Разумом богопросвещенным разумел еси, отче преподобне, яко едино есть на потребу человеком, еже благоугодити Господеви. Сего ради возлюбив добродетельное житие и во всем упование возложив на Бога, удалился еси во обитель Хутынскую ко преподобному Варлааму и был еси добрый ученик великаго учителя монашества, воистинну достойный благохвалений таковых:

Радуйся, от юности твоея веру непоколебиму стяжавый;
радуйся, девства и целомудрия усердный хранителю.

Радуйся, родителей и дом свой Христа ради оставивый;
радуйся, богатство и славу возненавидевый.
Радуйся, всякое житейское попечение отложивый;
радуйся, во обитель Хутынскую на подвиги иноческие пришедый,
Радуйся, богоносного Варлаама верный учениче и друже;
радуйся, житию того усердный подражателю.
Радуйся, любовь велию о Господе к нему стяжавый;
радуйся, наставником твоим возлюбленный.
Радуйся, от рук преподобного Варлаама крест подвижнического жития приявый;
радуйся, совершенное послушание духовному отцу своему явивый.
Радуйся, преподобне Антоние, земли Тихвинския молитвенниче и преславный чудотворче.

Кондак 3

Силою Вышняго укрепляемый, отче преподобне, мнози подвиги и труды во обители подъял еси, ибо вложи Господь в сердце твое к иноческому житию великую ревность. Преподобный же Варлаам, прозорливыма очима провидя в тебе сосуд избран Духа Святаго, уставу монашескому ты настави и в ангельский образ облече с

именем в память Великаго Антония. Ты же, радуясь сему, не преставай еси сердцем и усты воспевати Богу благодарственную песнь: Аллилуиа.

Икос 3

Имея в сердце твоём твердое упование на всесильную помощь Божию, в стенах обители Хутынския тихое пристанище спасения обрел еси, труды к трудом прилагая, в молитвенных бдениях, пощениях, по степенем добродетелей восходя к совершенству духовному. Темже убо послушание истинное учителю твоему Варлааму стяжав и добродетелем его поревновав, в туюжде меру возраста достигл еси и достоин явился еси ему преемник. Мы же грешнии вопием ти: моли Бога о нас с преподобным Варлаамом, да возможем явити, якоже и ты, образ послушания и смирения и с любовью зыватьи ти сице:

Радуйся, союзом любви с блаженным Варлаамом себе связавый;
радуйся, от наставника своего словесы мудрости напитавыйся.

Радуйся, без воли и благословения учителя твоего ничесоже творивый;
радуйся, от руки его лику иноческому приобщивыйся.

Радуйся, отцу монашества преподобному
Антонию Великому тезоименитый;
радуйся, яко житию его поревновал еси.
Радуйся, благодатию Божиею просвещенный;
радуйся, дарованный тебе талант умноживый.
Радуйся, Божественного смирения и терпения
подражателю;
радуйся, заповедей Господних верный
блюстителю.
Радуйся, иноческаго жития скорби и тесноту
возлюбивый;
радуйся, святых преданий отеческих хранителю.
Радуйся, преподобне Антоние, земли Тихвинския
молитвенниче и преславный чудотворче.

Кондак 4

Буря искушений и страхований диавольских не
возможе поколебати храмины твоея душевныя,
преподобне отче Антоние, осно!вана бо бе на
твердом камени веры во Христа, и хранима
трезвением и молитвами, имиже побеждал еси
врага спасения рода человеческого и восходил
еси от силы в силу к совершенству духовному в
меру возраста Христова, воспевая Ему:
Аллилуиа.

Икос 4

Слышав игумен Варлаам повеление
архиепископа Новаграда избрати инока обители

яко посланника ко Вселенскому Патриарху в Царьград, призва тя, отче Антоние, и благослови, да идеши с миром Ты же, отче, не утрашился еси долготы и тяготы пути сего, и вся повеленная тебе исполнивши, во Святую Землю странствие совершил еси, идеже Гробу Господню поклонился еси и мнози обители Палестины посетил еси. Мы же, воспоминаая послушание твое, благословением Божиим осененное, воспеваем ти сице:

Радуйся, в волю Божию всего себе предавый;
радуйся, смирения святого преисполненный.
Радуйся, волю архиепископа Новаграда и игумена Варлаама безпрекословно исполнивый;
радуйся, вся скорби многотрудного пути
благодушно подъявый.

Радуйся, от Вселенского Патриарха любовью о Христе почтенный;
радуйся, благословение того в землю Русскую
принесый.

Радуйся, Святую Землю посетивый;
радуйся, Гробу Господню во Иерусалиме
поклонивыйся.

Радуйся, странствие воистинну душеполезное
совершивый;
радуйся, странниче богомудрый и послушливый.
Радуйся, в послушаниях твоих никогдаже
возроптавый;

радуйся, образ Божий в души твоей хранивый.
Радуйся, преподобне Антоние, земли Тихвинския
молитвенниче и преславный чудотворче.

Кондак 5

Боготечней звезде подобен был еси, блаженне
Антоние, егда возвратился еси из Царьграда и
услышал еси словеса преподобнаго Варлаама
братии, собравшейся у одра наставника и
духовнаго отца своего: «Се уже, братие, конец
жития моего приближися и отхожу от мира сего.
Вас же предаю в руце Божии. Наставник же
ваш в мое место да будет Антоний, сверстник
мой». Темже уразумевая совершения благия воли
Господни на тебе, отче Антоние, вся братия
воспела еси Богу песнь хваления и
благодарения: Аллилуиа.

Икос 5

Видевше тя иноцы обители Хутынския яко
великаго благочестия подвижника,
возрадовашася приятием тобою игуменства,
егоже приемь, дивен настоятель был еси, добре
управляя обителию, ко всем нелицемерную
любовь являюще, и братию твою назидал еси к
подвигом постническим и во всяком
доброделании, да будут совершенны и
непорочны и да возносят немолчно хвалы
Христу Богу. Тии же, в любви Божии

укрепляющемся, пояху тебе таковая:

Радуйся, цвете благоуханный, процветый во обители дивнаго Варлаама;

радуйся, благословение отца твоего духовнаго на игуменство приемый.

Радуйся, преподобнаго игумена Варлаама достойный преемниче;

радуйся, любви учителя твоего к братии подражателю.

Радуйся, крото и утешение иноков Хутынския обители;

радуйся, явивый братии образ кротости и смиренномудрия.

Радуйся, яко немощи немощных братий терпеливо понесл еси;

радуйся, яко спасению многих послужил еси.

Радуйся, верный путеводителю шествующих ко Господу тесным путем иноческаго жития;

радуйся, добрый наставниче подвизающимся во брани духовней.

Радуйся, братолюбия христианскаго истинный ревнителю;

радуйся, лестнице, возводящая иноков на высоту духовнаго совершенства.

Радуйся, преподобне Антоние, земли Тихвинския молитвенниче и преславный чудотворче.

Кондак 6

Проповедник пустынного монашеского жития явился еси, преподобне Антоние, егда Духом Божиим направляем, обитель Хутынскую оставил еси и сквозе непроходныя дебри пришел еси ко езеру Дымскому, идеже обрет место красно, от Бога тебе указанное, первее ископа себе малую келлию и живяше тамо, пустынное безмолвие огласив пением: Аллилуиа.

Икос 6

Возсияв от Новаградския земли, преподобне отче наш Антоние, просветил еси чудным светом пустыню тихвинскую. Тогда сбытся о тебе слово Господне: «Не может град укрытись верху горы стоя», яви бо тя Христос наставника мудра и учителя иноком пустыннолюбивым, иже стекахуся к тебе, яко овцы к пастырю, могущу упasti их ко спасению и жизни вечней. Темже и мы благодаряще Господа, даровавшего ти таковую благодать, воспеваем тя сице:

Радуйся, обитель Хутынскую послушания ради Господу оставивый;

радуйся, от почестей земных в пустыню сокрывыйся.

Радуйся, промыслением Божиим в дебри тихвинския приведенный;

радуйся, пустынные лишения доблественне

претерпевый.

Радуйся, пророкам Божиим Или и Иоанну
Предтече пустыннолюбивый подражателю;
радуйся, истинного духа пустынножительства
наставниче.

Радуйся, безмолвныя дебри благоуханием
молитв твоих наполнивый;

радуйся, пустынное место в благоплодный
вертоград Христов преобразивый.

Радуйся, в напастех и искушениях терпение и
упование сохранивый;

радуйся, яко дарова тебе Господь место покоя
духовнаго.

Радуйся, в иноческих трудах неустанный
подвижниче;

радуйся, из глубины пустыни светивый миру.

Радуйся, преподобне Антоние, земли Тихвинския
молитвенниче и преславный чудотворче.

Кондак 7

Хотение имел еси, блаженне Антоние, еже в
безмолвии ненарушимом Господеви поработати.
Сего ради обретши камень велик посреде езера
Дымскаго, во дни и нощи непрестанно на
камени сем пребывал еси, воздевая руце твои
горе, и молился еси Христу Богу и Пречистей Его
Матери, вражии искушения побеждая и

воспевая в радости духовней ангельскую песнь:
Аллилуиа.

Икос 7

Новаго тя Антония Велакаго, наставника иноков
ко спасению яви Христос в стране Российстей;
ты бо земли севера духовно облистал еси, яко
един от первоначальник Фиваиды Русския, и
слава твоих добродетелей достиже многих
градов и весей земли нашея, подвизая ищущих
спасения приходить к тебе. Тако о твоём
пустыннем подвиге уведев, святой благоверный
князь Александр Невский дарова ти грамоту на
основание обители. Ты же, получивше
благословение архиепископа Великаго
Новаграда, начат обитель иноческую устроить.
Темже, угодниче Божий, ублажаем тя,
взывающе сице:

Радуйся, блаженство пустынножития
уразумевый;

радуйся, святое имя Господа Иисуса Христа в
сердце и устех твоих всегда имевый.

Радуйся, на камени во езере Дымstem
всенощныя молитвы и бдения усердно
совершавый;

радуйся, руце твои со дерзновением к Богу
воздевавый.

Радуйся, молитвою и бденным на столпе

стоянием плоть свою укротивый;
радуйся, воды езера Дымскаго твоими
молитвами и подвиги освятивый.
Радуйся, яко в водах сих благоверный князь
Александр Невский от болезни исцелися;
радуйся, яко и донныне вернии исцеления zde
улучают.

Радуйся, преподобных отец Диниила и Симеона
Столпников ревнителю;
радуйся, первый российский столпниче на
водах явивыйся.

Радуйся, собравый лик ученик, тебе
единонравных;
радуйся, при езере Дымстем обитель иноческую
устроивый.

Радуйся, преподобне Антоние, земли Тихвинския
молитвенниче и преславный чудотворче.

Кондак 8

Странника и пришельца помышляя себе быти в
мире сем, преподобне отче Антоние, покров
странником создал еси, устроивше обитель
святую, яко крин в пустыне тихвинстей
процветшую, в нейже и храмы во имя
преподобнаго Антония Великаго и Предтечи
Господня Иоанна соорудив и освятив, и келлии
соградив, уставом общежительным житие
братии утвердил еси, научая достойно и

праведно воспевати Богу ангельскую песнь:
Аллилуиа.

Икос 8

Всею душею послужив Господу и всем житием
своим благоугодив Ему, плоть твою духови
покорил еси, множество вериг железных на ся
возложив; воздержанием же и терпением
прилоги страстей умертвив, посрамил еси врага
и всю его гордыню и дарованное тебе стадо
упасл еси, любовь нелицемерную к братьям
являя. Темже вся страна Тихвинская светом
твоих подвигов и молитв осияваема, прослави о
тебе Господа, и яко воистинну ангела земного и
человека небесного тя ублажает и глаголет:

Радуйся, олтаря Господня непорочный
служителю;

радуйся, таинств Божиих достойный
совершителю.

Радуйся, житию и подвигом древних
преподобных отец подражателю;

радуйся, правило иноческого богоугодного
жития.

Радуйся, еще при жизни даром чудес
обогащенный;

радуйся, вериги железныя Христа ради на ся
возложивый.

Радуйся, яко тобою воздвиг Господь в стране

Тихвинстей дивную обитель;
радуйся, яко велию ревность при устроении
обители сея явивый.

Радуйся, храмы Божии во обители твоей
создавый;
радуйся, и себе самага храм Триипостасному
Богу сотворивый.

Радуйся, устава доброго общежития во обители
твоей насадителю;
радуйся, любви и милосердия к братии
исполненный.

Радуйся, преподобне Антоние, земли Тихвинския
молитвенниче и преславный чудотворче.

Кондак 9

Всякое естество ангельское удивися преславней
кончине твоей, преподобне отче Антоние, ты бо,
духом провидя близкое твое от земли отшествие,
завещал еси чадам твоим вся потребная ко
спасению, дал еси им последнее целование и
причастився Божественных и Животворящих
Христовых Таин, предал еси святую твою душу
в руце Божии, воспевая благодарственную
песнь: Аллилуиа.

Икос 9

Ветии многовещанныя не возмогут по
достоянию восхвалити пречудное прославление
твое, егда во дни княжения благовернаго князя

Димитрия Иоанновича Московскаго обретошася
мощи твоя нетленны, ихже дарова Господь
братии обители твоея во утешение,
бедствующим в отраду и помощь, болящим во
исцеление и во спасение всем, верою
притекающим к тебе и с любовью вопиющим
так:

Радуйся, свято и богоугодно течение земное
совершивый;

радуйся, мирно и радостно час кончины твоея
сретивый.

Радуйся, братию твою простивый и
благословивый;

радуйся, печаль братии о кончине твоей
благодатно утешивый.

Радуйся, чадами твоими духовными со слезами
погребенный;

радуйся, в храме преподобнаго Антония
Великаго, тобою созданнем, положенный.

Радуйся, от обители земная во обители
Небесная преселившийся;

радуйся, яко тамо предстоя Царю Небесному, о
братии обители твоея к Нему ходатайствуеши.

Радуйся, обретением мощей твоих обитель
Дымскую духовне возвеселивший;

радуйся, мощами твоими святыми преславно в
ней чудодействуяй.

Радуйся, яко рака твоя честная лечебница

явися недугом человеческим;
радуйся, яко мощей твоих дуси злобы
устрашаются.

Радуйся, преподобне Антоние, земли Тихвинския
молитвенниче и преславный чудотворче.

Кондак 10

Спасти хотя землю Русскую от напастей и бед и
даровати знамение благоволения к месту
по!двигов твоих, преподобне отче Антоние,
посла Господь людем русским безценное
сокровище, егда благословением Пречистей Его
Матери явися в пределах Тихвинских, яко
солнце пресветлое, чудотворная икона
Владычицы Богородицы Одигитрии,
Путеводительницы ко спасению, лучами милости
мир прсвещающая. Братия же обители твоея,
угодниче Божий, с радостным трепетом прияша
весть о чудном явлении, во умилении сердец
вопия Богу: Аллилуиа.

Икос 10

Стена заступления быша молитва твоя,
чудотворче святыи, во дни нашествий
иноплеменных, егда лютии агаряне разоряше
грады и веси земли Русския, и во времена
мятежей и нестроений в стране нашей. Тогда
братия обители в страхе и трепете со слезами и
пением изнесоша мощи твоя и положиша под

спудом храма, егоже ты создал еси; обаче мощи твоя, аще и в недрах земных почивающии, яко сосуд благодати Божией избранный, источаша исцеления всем прибегающим к заступлению твоему и вопиющим тебе таковая:

Радуйся, яко Господа Иисуса Христа о всех чтущих тя умилощивляеши;

радуйся, яко и Преподобословенную Матерь Его ходатайствовати о нас грешных преклоняеши.

Радуйся, Заступницы Усердныя благоговейный почитателю;

радуйся, к Богородице молитвенниче наш неусыпный.

Радуйся, покровом Пресвятыя Богородицы осененный;

радуйся, яко благоволением Ея возвеличен еси.

Радуйся, земли Тихвинския духовное сокровище;

радуйся, яко имя твое по всей земли Русстей славится.

Радуйся, града Тихвина и обители твоея хранителю и заступниче;

радуйся, о мире земли нашея незримый ходатаю.

Радуйся, молитвенниче крепкий за Русь Православную;

радуйся, всея страны нашея Российския ограждение.

Радуйся, преподобне Антоние, земли Тихвинския молитвенниче и преславный чудотворче.

Кондак 11

Пение благодарственное людие православнии приносят тебе, преподобне отче Антоние, ибо обитель твоя, во дни гонений на веру Христову разоренная, ныне обновися, и возставися, и новыми храмы украсишася, в нюже мнози паломники благочестивии приходяще, с верою и любовию к заступлению твоему прибегают, яко к первоначальнику и покровителю места сего. Темже молим тя, угодниче Божий, не отступи духом своим от братии обители и от всех чтущих и любящих тя, но присно ограждай их от всяких бед молитвами твоими, подвизая воспевати Богу ангельскую песнь: Аллилуиа.

Икос 11

Светосиятельна тя светильника, многа лета сокрываема, не восхоте Господь оставить под спудом; тако мощи твоя, преподобне отче Антоние, обретенны быша и со славою и псалмопением во обитель Успения Пресвятыя Богородицы на Тихвине принесошася, яко знамение милости Божия и благословения возрожденных обителей Тихвинския земли. И ныне, пред ракою мощей твоих предстояще, братия обители твоя вкупе со всеми любящими

и чтущими тя воспевают хвалебныя песни
таковыя:

Радуйся, обитель твою, от безбожных
разоренную, возставивый;
радуйся, подвизающимся в ней учителю и
богомудрый наставниче.

Радуйся, иноков ея благоговейных радование и
утешение;

радуйся, всех притекающих во обитель покрове
и заступление.

Радуйся, обретением мощей твоих Церковь
Русскую радостию исполнивый;

радуйся, чудесы от них веру и благочестие в
стране Российстей укрепивый.

Радуйся, приходящим на поклонение мощем
твоим святым благий предстателю;

радуйся, чтущим память твою небесный
покровителю.

Радуйся, светильниче Божия благодати, страну
нашу духовно просветивый;

радуйся, от земных к небесным дух наш
возвышаяй.

Радуйся, яко тобою Дом Пресвя!тыя Богородицы
– град Тихвин хвалится;

радуйся, яко тебе ради и вся Российская земля
веселится.

Радуйся, преподобне Антоние, земли Тихвинския
молитвенниче и преславный чудотворче.

Кондак 12

Благодать велия возсия во всей богохранимей стране Российстей, егда смотрением Божиим возвратишася во град Тихвин чудотворная икона Владычицы наша Богородицы, Тихвинскою именуемая, и поставлена быша в соборе Успения Божия Матере на столпе одесную раки мощей твоих, преподобне отче Антоние. Веруем, яко ныне ты, угодниче Божий, вкупе со всеми святыми земли Российския умоляеши Пречистую Матерь Господа о святей обители, утвержденной рукама твоима, и о всех людех страны нашей, да просветятся они светом веры истинныя, воспевая Спасителю благодарственную песнь Аллилуиа.

Икос 12

Поюще святое и равноангельное житие твое и прославляюще подвиги твоя, во умилении сердец славим, хвалим и величаем возвеличившаго тя Господа, даровавшаго ти благодать чудодействовать: от лет бо древних и до нынешняго дне вси призывающии тя и покланяющися нетленным мощем твоим, неоскудную помощь получают: слепии прозирают, хромии ходят, разслабленнии встают, беснующиися от насилия духов злобы свободждаются, недужнии от болезней и

смертоносных ран исцеляются. Темже видяще при раце мощей твоих знамения и чудеса, сынове российстии с верою и любовью призывают тя и вопиют тебе сице:

Радуйся, славою и честью от Владыки своего Христа увенчанный;

радуйся, яко с Царицею Небесе и земли о нас молишися.

Радуйся, ангельских воинств собеседниче; радуйся, патриархов и пророков спредстоятелю.

Радуйся, апостолов Христовых последователю; радуйся, сияющая звездо в сонме преподобных.

Радуйся, яко со всеми святыми в Царствии Небеснем торжествуеши;

радуйся, обетований Христовых наследниче.

Радуйся, яко с горящим светильником вшел еси в радость Господа;

радуйся, Церкви Русския Православныя пресветлый светильниче.

Радуйся, яко о тебе радуются ангели на Небеси;

радуйся, яко о тебе Бога славят человецы на земли.

Радуйся, преподобне Антоние, земли Тихвинския молитвенниче и преславный чудотворче.

Кондак 13

О великий и преславный чудотворче, преподобне отче наш Антоние, всея земли

Русския преславный чудотворче, приими сие малое моление наше, и благоприятным твоим ходатайством умоли Всемилостиваго Бога, да избавит нас от всех врагов видимых и невидимых, от всякия скорби и печали, от напрасныя смерти и будущия муки, и да сподобит вкупе с тобою и со всеми святыми во веки воспевати Спасителю нашему благодарственную песнь: Аллилуиа.

